

四庫全書

集部

欽定四庫全書

蛺蝶集卷三

元 張翥 撰

七言律詩

無題

見時略略望遙遙有月闌干待袖招得巧蜘蛛絲縷細
傳聲鸚鵡舌關嬌仙家絃管寧無譜天上星河亦有橋
雲雨或時消息斷不如朝暮石城潮

聞笛

何人吹笛傍江干
木落淮南夜色寒
三弄水邊人艤棹
一聲雲杪客凭欄
梅花簌簌吹應落
楊柳依依折欲殘
惆悵綠珠何處在
綺窓深鎖月漫漫

臺城

運盡黃旗晉祚開
天星俄復圯三台
方驚掘地雙鷺起
已見浮江五馬來
草暗離宮碑仆土
雨殘戰地骨生苔
當時一掬新亭淚
猶帶寒潮日暮迴

冶城

此地先皇駐六龍
鼎成龍去杳無蹤
御牀羅帕塵空暗
輦道朱門草已空
題榜侍臣留帝勅
築亭真士記天容
自憐不及窺弓劍
愁絕寒城響暮鐘

鹿苑寺

千古南朝幾劫灰
蕭梁寺額獨崔嵬
化蛇妬婦餘空井
刺虎將軍有舊臺
江口山紅寒照沒
石頭樹白暝烟來
滿衣落葉西風急
更為憑高送一杯

瓦棺寺

脩竹長松畫寂然梵宮高閣起中天虎頭妙畫空餘刻
鵲吻名書竟不傳石柱至今標宿莽瓦棺何處葬寒烟
憑高更盡闌干曲及取江山未暮前

石頭城用薩天錫韻

逶迤石路帶城遙古寺殘僧薜半凋一自降王歸上國
空餘故老說前朝壞陵鬼剽傳金盃畫壁仙妝剝鳳翹
更欲留連盡奇觀夕陽江上又生潮

秦淮晚眺

赤欄橋下暮潮空，遠火疎春掩霽中。
新月半天分落照，斷雲千里附歸鴻。
嚴城鼓角秋聲早，故國山川王氣終。
莫訝時來一長望，越吟荆賦思無窮。

八月十六夜對月

蟋蟀梧桐秋滿庭，浮雲散盡見疎星。
仙人修月渾無跡，使客乘槎自有靈。
一道銀河通碧海，三更白露下青冥。
西風忽起吹黃鵠，夢斷瑤臺醉未醒。

七憶

憶錢塘

平湖十里碧漪風
歌舫漁舟遠近同
天竺雨餘山撲翠
海門潮上日蒸紅
傷心花月隨年換
回首閭閻委地空
白髮故人零落盡
浮生悵望夢魂中

憶姑蘇

讓王城外暮雲黃
忍使行人哭戰場
臺上麋遊香徑冷
陵頭虎去劍池荒
竹枝夜月歌仍怨
蓴菜秋風興漫長
不是不歸歸未得
五湖烟水正茫茫

憶會稽

千巖秋色徹層霄憶昔來乘使者輶翠袖屢扶蓬閣醉
籃輿時赴寶林招山陰客已無春會溪上風猶送暮樵
此恨古今銷不盡西陵寂寞又回潮

憶維揚

蜀岡東畔竹西樓十五年前爛漫遊豈意繁華今劫火
空懷歌吹古揚州親朋未報何人在戰伐寧知幾日休
惟有滿襟狼藉淚何時歸洒大江流

憶金陵

昔年曾上鳳凰臺，二水三山眼界開。
六代繁華春草歇，千年興廢暮潮哀。
燈窓禪坐時聯句，山館仙遊幾引杯。
最是令人愁絕處，夕陽雙燕自歸來。

憶吳興

憶汎苕華溪上船，故人為我重留連。
半山塔寺藏雲樹，繞郭樓臺住水天。
白榜載歌明月裏，青帘沽酒畫橋邊。
計籌山下先塋在，欲往澆松定幾年。

憶閩中

漫漫漲海際天涯萬里曾乘使者槎
梓澤重尋仙客洞草堂頻醉故侯家
人多熟酒燒紅葉市有生蠶賣象牙
安得夢中真化蝶翩然飛上刺桐花

中秋次友生玩月韻

華月光浮玉色醪涼颼時拂紫綈袍
河通閣道流雲急星繞天樞出地高
按舞豈無仙跨鶴縱吟聊放客揮毫
扁舟近憶樟亭下曾看魚龍送夜濤

閏九月遊錢塘南屏諸山

山僧領客興何長
慧日峰前俯大荒
舊俗尚傳三令節
人生難遇兩重陽
丹楓換葉隨秋老
黃菊留花過閏香
更與摩崖訪陳跡
西風吹冷薜蘿裳

閏中秋是日白露節

河漢雲消溢素光
重開樽酒據繩牀
嫦娥斟酒猶前夕
老子婆娑且醉鄉
風信兩番生綠桂
年華一寸入黃楊
怪來詩思清難忍
早雁聲中露欲霜

七月望對月

新秋月色初圓夜遠客樓中獨坐時却數只驚身老大
相看聊與影栖遲神仙宮闕開三島牛女星河淡兩旗
不是吳剛頻伐樹西風應長出輪枝

中秋廣陵對月

散盡浮雲月在東白蕉衫冷小庭空星河夜影樽罍裏
城郭秋聲鼓角中落葉有光時墜露鳴蛩無響不含風
此生五十三回見只遣嫦娥笑禿翁

上元宿通州楊原誠寓宅

禁城東下一川平
杳杳烟蕪淡淡晴
風滾暗塵羊角轉
水披殘凍鴨頭生
離居有酒春堪醉
小市無燈月自明
還憶故園今夕賞
玉人花底共吹笙

丁亥元日

梅花院落雨聲中
窓外春寒淅淅風
臘酒撥醅浮玉燴
夜燈挑燼落金蟲
星環甲紀驚身老
雪解寅朝驗歲豐
還喜驛書催上路
寸心長在日華東

中秋玩月崇真萬壽宮

西風吹月出雲端松柏流光繞石壇上國山河天廣大
仙家樓觀夜高寒似聞玉杵鳴玄兔疑有瑤笙下翠鸞
只把酒杯供醉賞不知零露滿金盤

四月旦日雨中送春

苦筍櫻桃次第來雨餘官樹綠連街白纓蚯蚓歌幽草
赤幘虵蟄穴古槐短髮欲星愁有效幻身如電事無涯
人間恩怨何須論團扇清風又入懷

述古真人壽席為賦

龍虎山中有洞天，長生見此老彭錢。
羽衣小作金門客，玉籙元書紫府仙。
藥竈夜光丹似日，壽尊春色酒如泉。
未須便覓雲林隱，更閱人間八百年。

春日泛湖陪李旻德融席上作

春來渾不到湖邊，偶逐東風上畫船。
花氣暖流黃鳥岸，水光晴展白鷗天。
綠尊興極頻呼酒，銀管聲高正輟絃。
我比放翁應更放，看花不獨海棠顛。

雪後苦寒

雪後北風尤苦寒
燎爐起擁懶頭冠
謾懷學士醪醕酒
仍對先生苜蓿盤
戎馬尚驚塵滾滾
客槎空望海漫漫
向來事是今朝夢
底用悲吟且自寬

喜雨

久旱
苦蝗

日氣如焚土氣腥
黑雲當午忽冥冥
雨工分下旗千隊
神姥攜來酒一瓶
牛馬長河迷渚渚
涖龍蛇平陸起雷霆
快看一洗飛蝗盡
猶及秋田晚稼青

清明日到陳莊

出郭東門古道斜，獨騎款段穩于車。
春纔三月已兩月，村舊百家無十家。
山徑低飛鬼蛺蝶，野塘競噪官蝦蟆。
東風不奈晚愈惡，吹散滿身楊白花。

東西馬塍春行東平湜伯容

清明時節每多陰，楊柳人家花滿林。
侵晚乍收連日雨，賞春常負百年心。
鳬翁一一蒲塘暖，雉子斑斑麥隴深。
為報能詩平處士，剩攜芳酒共幽尋。

暮春有感次劉監丞

二鳥寧容一處囚，能鳴何似不鳴休。
來今往古無窮事，剩水殘山總是愁。
欲識碧雲須麗句，擬裁白雪欠名謳。
強顏未得投簪去，一濯塵纓萬古流。

上京大雨驟寒飲周從道所

莫年已卜田園去，豈意猶歌行路難。
且復酒杯同旅次，不堪人事總憂端。
山林茆屋三生遠，風雨氍毹六月寒。
吾友有家應此住，老夫何地挂吾冠。

遊鳳凰山故宮至高禱臺鴻雁池

衰草寒烟老木風
南朝佳氣落秋空
壁來山鬼遮秦使
盤泣仙人出漢宮
壞堦尚傳祠乙鳥
荒池曾見射飛鴻
騷人自古多離思
長在登臨感慨中

春日偕監中士友遊南城

樓閣參差紫翠間
微風不動綵雲閒
柳垂禁籞絲千尺
水繞宮溝玉一環
春樹鳥鳴圓似筦
夕陽駝影兀如山
醉鞭緩緩吟歸去
燈火城東未掩關

上京秋日三首

山前孤戍水邊營落日無人已斷行
甌脫數家門早閉
纈溫千帳火宵明白摧野草狼同色
秋入榆關雁有聲
最是不禁橫笛怨海天秋月不勝情

水繞雲迴萬里川鳥飛不下草連天
歌殘勅勒風生帳
獵罷關氏雪沒羈紅頰女兒花作隊
紫髯都護酒如泉
時巡歲歲還京樂別換新聲被管絃

遠山平野浩茫茫曾是當年古戰場
飲馬水乾沙窟白

射雕塵起磧雲黃中郎節在仍歸漢校尉城空罷護羌
今日車書逢混一不辭垂老看疆鄉

三月二日賞杏花光岳堂分韻

柳色初青草漸茸春寒猶勒杏花風新煙院落清明後
過雨園林罨畫中洛社衣冠今日再蘭亭觴詠此情同
吾年最老身仍健更向尊前借酒紅

臘日飲趙氏亭

城上高亭一再過每看風物費吟哦近詩頗效寒山子

往事徒成春夢婆
賸買十千燕市酒
閒聽二八越娘歌
梅花枉報春消息
祇遣今年別恨多

秋日偕成竹居秦景桓遊蜀岡萬花園

九曲池平帶蜀岡
吳公臺遠隔雷塘
閒尋遺跡懷千古
迥立高丘望八荒
黃落山川秋廣大
青冥風露日淒涼
一尊不慰登臨地
朔雁南雲恨更長

春日遊王公亮南墅

人家星散住村墟
第二港頭潮水初
蛺蝶一闌花院落

烏犍千畝雨鉏犂養魚已得陶朱法種樹還抄汜勝書
興熟不辭歸路遠醉扶斜日上柴車

秋日陪吳興諸府公宴魯公池上

芙蓉池上會羣公滿意華筵笑語中虹影連蜺山外雨
荷香澹蕩晚來風歌催銀甲箏逾急涼入金樽露易空
我亦玉堂揮翰手題詩合在水晶宮

刊史局雨涼陪韓左丞叔亨小集

斷煙疎雨散秋虹古木高堂納晚風青史文章千古上

紫微星象五雲中前朝無似於今盛羣彥難期此會同
涼思滿簾宜解帶好懷寧放酒杯空

中秋張外史招賞月失約賦以謝之

明月中天霧氣消酒醒涼思正飄飄星河不動秋空濶
鐘鼓無聲夜寂寥露下遠山皆落木風來滄海欲生潮
仙家玩事無緣到虛負瓊樓聽玉簫

辛巳二月朔登憫忠閣

百級危梯遡碧空憑闌浩浩納長風金銀宮闕諸天上

錦繡山川一氣中
事往前朝僧自老
魂來滄海鬼猶雄
只憐春色城南苑
寂寞餘花落舊紅

早發潞陽驛

征車如水轡如絲
望入金河欲曙時
萬里山川環拱抱
九天宮闕起參差
風林泥泥秋多露
野淀稜稜曉有澌
三十餘年觀國願
白頭今日到京師

上京即事

灤河東出水潏洄
疊坂層岡擁復開
金柱鎮龍僧呪罷

玉輿馭象帝乘來中天星斗朝黃道塞漠雲山繞紫臺
欲擬兩京為賦頌白頭平子愧無才

舟發浙江夜泊廟山驛

風帆東上浪冥冥鐘鼓山前近驛亭江海秋生河漢白
魚龍夜沒水雲青誰從三島求仙藥自信孤槎應客星
好喚吳兒扣舷起浩歌呼酒月中聽

豫章山房為見心復公賦

劍江寺裏古樟樹百尺如蓋青童童山靈長此護林壑

雷電不許藏蛇龍掃石僮來秋葉後談經僧坐晝陰中
題詩禪房更瀟洒便與王城祇樹同

上清山中

煙景空明石路微千年草木駐光輝山中觀闕金銀氣
天上神仙黼黻衣赤石大溪魚欲化青雲玄圃鶴長飛
只今浩劫頻來往未信滄洲與願違

四明寓居即事

郡城重鎮浙江東傲道荒蕪雉堞空於越山川星紀外

故王臺榭水雲中
船來蠻賈衣裳怪
潮上海鮮鱗鬣紅
不向旗亭時一醉
行人愁殺柳花風

郡樓晚望

全晉山川氣象開
滿城煙樹擁層臺
土風舊有堯時俗
人物今無楚國材
千嶂晚雲原上合
兩河秋色雁邊來
昔賢勝賞今陳迹
落日登臨畫角哀

雁自代過晉嶺客中感興

雁行初自雁門來
遠度平沙陣勢開
光祿塞空霜氣冽

受降城廢水聲哀烏孫公主歌難和猿臂將軍射未回
今日客中腸易斷不須更上最高臺

往平道中

風起征塵滿鬢頻呼驛卒緩前驅已悲白骨多新鬼
尚說黃巾半畏途麥老大田鳴乳雉草深荒徑竄妖狐
停驂思飲瓜園井欲倩鄰翁放轆轤

宴四明江中醉卧及醒舟已次車廐站

使節重來省昔年舊遊零落一凄然山川在眼空陳迹

歌舞催人又別筵風捲潮聲全海起雨分虹影半空懸
酒醒惟有斜窓月偏照姚江獨夜船

發樂清縣岑山亭

百尺新亭起碧岑長藤古木鬱蕭森山重山掩分吳越
潮落潮生自古今飛鳥去邊浮海色夕陽明處散秋陰
五雲長近仙臺上時聽鸞簫月下吟

石門書院瀑布

飛泉噴薄下靈湫疑有龍居最上頭長日風雷穿石起

半空河漢挾雲流青牛隱去神宮在玄鶴歸來洞府幽
弭節名山諧宿願築居終羨昔賢游

西峽渡

江上日高寒霧開渡頭風順早潮迴中流白舫翩翩下
兩岸青山滾滾來蠻媪浣紗衣似雪驛夫到岸鼓如雷
舍人起揭蓬窓坐笑割羊桃薦酒杯

湄洲嶼

飛舸鯨濤渡渺冥祠光壇上夜如星蛟龍筍簾縣金石

雲霧衣裳集殿庭萬里使輶游冠絕千秋海甸仰英靈
乘風欲借天風便彷彿神山一髮青

次福青宏路站州守林清源邀飲治所

酒家籬落隔青棕更在輕煙細雨中繞郭好山橫野碧
緣溪芳樹立春紅故人雪鬢年年老太守風謠處處同
十載相逢又相別不堪迴首海雲東

浮山道中

處處人煙有酒旗棟花開後絮飛時一溪春水浮黃顰

滿樹春風叫畫眉入境漸聞人語好看山不厭馬行遲
江蘿綠徧汀洲外擬折芳馨寄所思

北山苦雨待程繼先舟行

老態已成便早睡呼兒更與助深杯半窓風雨催秋到
一夜湖山入夢來潦水無根殊汎濫蛩聲多事為悲哀
不知明發緣何喜滿意燈花落又開

寄龍翔訢公長老

古笄橋邊夾道斜老禪方丈梵王家山人宴坐時分芋

天女飛來或散花
護法神龍蟠結構
定巢春燕避袈裟
此生已悟空無住
欲就莎房借鹿車

登嚴先生兩釣臺

兩臺有徑可躋攀
老樹長藤蒼蔚間
漁釣自忘天子貴
風雲何似客心閒
鐘催夜月來孤寺
帆挾春濤過亂山
寂寞羊裘軒下路
幾人攜酒酌潺湲

滕王閣晚望

峽嶢傑閣起城皋
尚想君王結構勞
楚國山川推壯麗

唐人文賦擅風騷天開彭蠡連江濶山向番禺入嶺高
萬里登臨一懷古朔雲秋興正滔滔

南山蓮社偕韓友直伯清昆季游龍井寺

長憶東林遠法師三生張野有前期經書貝葉繙重譯
漏刻蓮花禮六時長老布金多滿地高僧卓錫自成池
不妨隨喜諸天上扶得風簷玉一枝

天竺山中訪項可立不遇

葛洪川畔千年寺路繞長松一澗分潭影青移行處岫

嵐光白散望中雲猿公吟樹應思侶鹿女銜花不亂羣
常羨山僧專勝概水聲林下百無聞

游萬松菴

黃塵撲馬出西城忽見雲林眼倍明竟日寂無山鳥語
滿嵐純是澗松聲石幢花雨何時灑禪榻茶煙特地生
客自去來鐘梵外老僧於世已忘情

扈從之上京過龍門

兩崖高立色冥冥俯視空光一罅青石兀馬蹄危不渡

水漂龍氣暗聞腥山川壯自開天險風雨陰疑來鬼靈
我欲重尋舊題處濕雲寒蘚滿巖扃

游武康禹山留宿昇元宮

白石西邊山更青杖藜塵外得經行鳥翻夕照落空翠
人逆松風聞澗聲道士煮茶留夜話田家燒草起春耕
也知真境多佳境擬約衡茅寄此生

四月護三喪渡江之宴塢

亂雲散黑收殘雨落照浮紅滿大江煙際小星添箇箇

沙頭宿鳥下雙雙
文章爛漫工何補
膽氣崢嶸老未降
新喜仙翁與釋子
買山容作讀書窓

天竺北峰行香汎舟湖山堂

肩輿直過上湖西
泱泱晨光遠欲迷
風起澗松清不暑
雨乾石路淨無泥
泉分絕壑流邊續
雲到高峰盡處低
投老寧能數來往
把杯洞口聽猿啼

聽松軒為丹丘杜高士作

長松千樹擁前榮
虛籟還從樹底鳴
一片海濤雲杪墮

幾番山雨月中生
茶香夜煮苓泉活
琴思秋翻鶴帳清
安得南華老仙伯
相隨軒上說風聲

玄圃為上清道士周靜脩題

路上仙巖最上溪
仙家住處有丹梯
瑤臺鶴下天風冷
靈鎖花深曉日迷
五色芝房團紫蓋
千年石髓裂青泥
羽人即此宜高隱
豈在崑崙萬國西

梅雪齋為紫霄宮楊逢賓題

雪樹生香滿佩巾
紫霄最上集仙真
苔荒鶴跡渾無路

花暗笙聲不見人
瑤圃月寒通白曉
丹臺雲暖駐長春
莫教流水山前去
恐似桃源客問津

屏山凝翠臺為上清道士劉伯達題

仙館深居寂寞濱
千巖濃翠濕無塵
築臺一日臨風雨
驅石中宵使鬼神
潭上晝游魚聽瑟
花間春醉鳥銜巾
山靈不是藏真境
留待雲棲學道人

愛松亭為嘉禾三塔寺寬海雲賦

攜李灣頭窳渚波
種來松樹繞庭多
碧粘老甲渾苔蘚

黑入秋陰半辟蘿古剎每聞龍捨宅神僧常似鳥為窠
無人訪得韋侯筆與作山堂障子歌

冰雪菴為衡岳北山上人賦

衡嶽山中老道人一龕一衲足容身禪林出定雲生室
詩境行吟清入神瓶水不凝霞氣暖石門長埽虎蹄新
只應煨芋燒茶外乞火時時到寺鄰

雲松巢為翰林學士王公儼作

高人自昔愛雲林擬作幽居寓素心遁世每懷箕叟隱

題詩聊效謫仙吟
幾番白鶴迷秋夢
半樹青蘿補夕陰
獨坐天風灑毛髮
高寒何似玉堂深

醉月堂為萬聲遠作

月有秋期醉有鄉
虛堂中夜挹流光
九天零露澣尊俎
萬里高風扶佩裳
白鳳飛回聲縹緲
玉笙吹徹夢清涼
醒來却覓神遊處
狼籍中庭桂子香

不繫舟漁者陳子上自號

本來無繫亦無舟
隨意江湖可漫遊
縱遣西風吹水外

不妨明月爛沙頭人情平地波瀾起身世虛空日夜浮
安得從君歸把釣只將吾道付滄洲

浮雲道院

在吉安

百年身世與雲俱日看紛紛變態殊江雨欲來龍氣黑
天風忽散鶴聲孤行藏與道同舒卷富貴何心較有無
此意高人還盡解數椽營在楚山隅

石田山房為毛叔達作

聳確初開百畝荒四明山麓有丹房種來玉子雙雙白

鑿破雲根寸寸方赤水洞天宜避世
金椒道士可休糧
會尋瀑布聲中去一洗吾生浩劫忙

雪巢為上清劉道士賦

團團茆蓋一巢輕雪滿千山虛白生象外
乾坤還太古
望中樓觀盡通明雲藏宿鶴渾無迹
水落長松暗有聲
人在寒空最高處羽衣瑤佩不勝情

次韻劉伯貞與金山即休了長老唱和

老禪居處水雲重此地纖塵不可容
潮色平鋪無際海

日光先上最高峰踏花佛馭紅牙象獻寶神騎白耳龍
第一江山第一座幾時來聽講時鐘

北山禪房次危太樸韻

一簞小寄青蓮宇尺土巍臨白玉京名藥曠庭分草木
好詩書壁雜真行劫塵息後心源淨僧臘高來領雪生
我住巷南師巷北相過談到暮鐘聲

游金山東即休了公

八十了公如古佛禪心已久會真如飯供南海浮來鉢

經鈔西天譯後書持咒降龍秋雨歇焚香迎客晚潮初
此生終擬依蓮社猶苦塵緣未破除

寄越寶林別峰嘉禾水西仲銘

越絕千峰有別峰老禪宴坐梵王宮願中結習三生熟
機外忘言萬法空錫影夜飛天姥月鐘聲曉度禹陵風
孔淳自許游方者須覓巖居竺法崇

劫灰不到爽溪亭珍重堂頭老仲銘朝暮鐘魚仍梵唄
虛空龍象自神靈幽禪定後燈懸壁清盥閒來水在瓶

草座麻衣亦吾事會尋臺上共繙經

寄越能仁用章俊禪師

晚節叢林欲孤喜公赤子服於菟千巖萬壑平安否
淡飯長齋飽得無坐觀山童闕止水講經龍女獻明珠
沃洲勝會還堪繼豈獨東林有社圖

寄清遠渭禪師

自聽龍翔寺裏鐘劫餘金碧更重重天王按劍踏魔女
羅漢弄珠降老龍蒲室千鐙誰繼照渭川一派自分宗

未知今日西岡塔留得荒寒幾箇松

西岡乃笑隱塔

寄四明定水見心復禪師

聞公近住慈谿寺今是璘師第幾鐙笑我在前圖作佛
只今投老欲依僧瓶中舍利藏來長窓外獼猴喚得麀
會拂塵衣上方去天香樹底乞花蒸

寄平江開元寺雪窓光公

蜀人

獨木山寮晝不開禪餘香印已成灰寺分麋鹿臺前住
人向魚鳧國裏來佛鉢供多光類玉祖衣傳久色如苔

一枝得箇印州竹拄到雲居不擬回

送西江賢古愚上人

山僧新自豫章回千里還乘渡水杯問法諸天龍象繞
談經半夜鬼神來西風夏解江雲變南國秋歸野菊開
欲叩心宗塵外侶白頭今日已成灰

送範準堂住天台法輪寺

白首南屏坐不回偶提佛法住天台幽禪有味風生磬
瘦影無塵月滿臺羅漢山中飛錫過鮫人海上獻珠來

不知萬壑煙霞底何處尋師撥芋煨

送道存師游方

故人去作遠遊僧千里關河付脚膝
壞衲秋縫慈母線空山夜別祖師燈
王城乞食應持鉢岳寺棲禪暫挂簾
何日諸方叅叩徧一菴歸老白雲層

送絕宗繼講師住大雄寺

大展三衣古道場真人高拱殿中央
曼陀雨散天花落薰陸煙生石乳香
纚纚風雷飛講舌耿耿龍象繞禪牀

師行不廢宗雷社會覓籃輿到上方

送泐季潭還龍翔

時笑隱已化

曾將小品問支公真是人間學道雄
弟子不須悲滅度禪師久已證圓通
長懷石上三生舊無復溪頭一笑同
想見西岡歸禮塔神光時遶夜壇紅

送至上人還金陵

卷有笑隱丁仲容詩

朱雀橋邊白下門舊游回首不堪論
令威未返遼東鶴圓澤難招石上魂
金刹火餘灰已冷錦囊詩在墨猶存

南來邂逅逢師話老淚臨風墮酒尊

聞雲海寬寶林同二師寂音悼之

久別吳寬與越同近傳歸寂故禪宮葛川有日尋圓澤
蓮社無人寄遠公亭外松焚雲海靜井間鰻化寶林空
只留一點詩燈在長照殘山剩水中

答復見心見寄

蓮花峰下天香樹吹老西風幾度秋僧寶真同洪覺範
詩窮我亦孟參謀文章宇內千年事身世江湖萬里舟

甚欲相期石橋路更須同訪羽人丘

重寄水西新公道場渭公三塔寬公

我恐前生老法華退居清淡即僧家禪師有道常騎虎
侍者通神自辟蛇已負法身來震旦終拋塵網覓提奢
洞庭春後多風水准擬南歸買釣車

道場山頂千年寺迥出雲林最上層師已新聞出世法
我今渾似在家僧書遲不到秋風雁詩苦長縣夜雨燈

蚤晚南歸有船

闕

籌峰真館追松瀑黃石翁尊師

月色今宵恰滿規
有山如此愧來遲
金堂石室不到處
澗水松聲無盡時
麻姑凌寒或送酒
木客入夜同吟詩
匡廬老仙去已遠
悵望雲間笙鶴期

送張惟善使還上清宮

驛騎翩翩萬里歸
上清山下是巖扉
金銀宮闕神仙館
河漢文章織女機
赤羽頻縣行處節
青霞自剪醺時衣
使途邂逅還相別
回首江雲朔雁飛

送道士張一無還安仁省親

南楚東吳一草亭道人元不歎飄零
幻身在世真如露客鬢經年漸欲星
招隱山中猿鶴怨話禪石上鬼神聽
殷勤此別須回首不忘君家桂樹青

贈別句曲外史張伯雨

玄洲別島鬱龍從滿谷蜨雲護萬松
外史編圖瓊笈秘隱居留誥玉函
封丹池雨見龍無角藥圃春肥鹿有茸
擬借一龕為洞吏與君來往大茅峰

壺隱為滁州徐仁則賦

匏繫深知固蒂難養生聊托一壺間
仙公賣藥曾藏市逸士操瓢只在山
千里江湖浮處遠百年日月貯來閒
底須狡獪驚凡目剖破輪囷別築環

懷計籌山通真館純一雲峰高士

彫年短髮苦駸駸只益孤懷歎惋深
老比師丹渾忘事死無鍾子絕知音
哀猿易下三聲淚獨鶴長存萬里心
漫憶雲峰凌羽士故山無夢可相尋

送匡山王濟遠朱弘道南歸

萬峰蒼翠繞舒城中有琳宮似上清
俠客劍寒騰虎氣仙人笙響作鸞聲
到山定及朱桃熟歸洞應多白鹿迎
好在丹房保玄極九還金液待君成

幻寓菴用虞芝亭學士韻

暫寄微軀在世塵此菴名亦強為鄰
了知百歲旦暮事豈泥三生前後因
非假日明那有目忽隨空壞本無身
要知枯坐環中者別是人間不死人

送述古彭大年真人

袖有神方煉紫荷幾年璫籙著功多仙人海上騎黃鶴
道士山中認白騾棗木斗盤藏霹靂楊枝瓶水灑天河
只應小閱開皇劫一劍秋空處處過

大年仙人樂天遺雷符一卷為題

一夕空飛解劍形先生神氣即風霆已還天闕朝羣帝
別寫雷符使六丁遼海鶴歸雲邈邈葛陂龍化水冥冥
只今有子能傳業來奉祠官篆檄靈

題開闢吳宗師徒孫丁自南卷

羨君學道上清宮
親得先生早發蒙
枸杞未逢朱孺子
丹砂須問葛仙翁
窓前點易寒研露
壇上焚香夜禮空
化鶴歸來定何事
從師千載住崆峒

送劉彥基奉宗師命訪求道德經註

北風霜霰日冥冥
送子南歸出廣庭
上國幾年陪賜履
名山隨處訪藏經
藜光照夜時燃火
龍氣衝寒直射星
却憶冲虛觀前路
豫章雙樹更青青

壺洲為上清張道士題

錦水溪頭觀闕青
仙家原不隔滄溟
鳳麟洲渚寒凝碧
雲霧衣裳夜降靈
金醴浸花留客醉
玉笙吹月使龍聽
看君福地容蕭爽
長與曾孫宴幔亭

送上清道士李自賓歸山

歸去青溪點易窓
仙林如子世難雙
丹藏虎豹千山雪
劍度魚龍萬里江
別洞苔花分石路
古壇松子落巖淙
道人不用尋煙火
朮煎經冬正滿缸

送陳復齋歸婺之武義清寧觀

武川道館白雲間，蕭散真宜羽客閒。
丹侶有情開藥竈，青童應在守蘿關。
岡頭叱石成羊起，花下吹笙馭鶴還。
歲晚相思擬相覓，只愁落葉滿空山。

送胡道士還豫章舟居

道人船子是行窩，如此東湖煙水何。
寶劍攜將叱雷雨，鐵符埋得鎮蛟鼉。
雲盤仙篆朱文細，海浴神丹絳氣多。
應與匡廬桂風子，山中騎虎夜相過。

送薛鶴齋南歸吳中

老鶴幡然憶楚皋
南來直渡浙江濤
千年故國悲城郭
萬里晴空見羽毛
候館夜吟飛綵翰
靈壇秋醮振琅璈
隄廩白屋山中路
留得仙家舊種桃

雲臺真館為上清周用章作

突兀中天積翠遙
層臺宛似鬱羅蕭
清池曉浴丹如火
白石春耕玉有苗
此地來龍如可築
他年歸鶴底須招
只應月夜游仙侶
時復吹笙下紫霄

送方玉壺羽士之京師

學道武夷還上清羽人毛骨鶴同輕丹留別室生虹氣
敵隔空山作虎聲劍外鬼神來叱咤畫中河嶽入經營
緱山合在飛廉館會見祠光徹夜明

輓張伯雨宗契

一夕星壇蛻羽衣山靈何許散靈輝書留真誥陶弘景
名在丹臺馬子微海上青羸應遠去鑪中白兔想潛飛
風篁後夜還成韻猶似簫聲月下歸

鹿巾曾入紫宸朝歸向名山駐綠輶龜脫生筒無俗累
鶴存瘦骨有仙標三元饑飯杯猶在五色香烟火已消
應復神遊易仙館人間楚些若為招

童稚情親到白紛真香幾向鵲爐焚丹成自浣天壇雨
劍解空埋月磣墳山友分將石刻帖門人唱得錦飛羣
他時會續君前傳刊作青瓊板上文

月磣
墓所

正一冲和宮楊弘道以虞學士詩求和

玄都桃是舊時花曾駐春遊送客車翰墨尚看延閣老

松蘿長護羽人家丹砂鍊得仙翁術白絹封來諫議茶
文采風流徒想見九霄無佩乞飛霞

往事真成過眼花前王俱此走降車鶴歸華表千年郭
燕入烏衣百姓家雨壞苑牆生野薺雲殘候館老山茶
欲將弔古無窮意高倚披雲賦落霞

廣東帥府掾林德恭餉藤簾

韜向簫中一握輕風漪八尺勝桃笙文編黑白蚶皮滑
漆透丹黃虎魄明隄上卷將滄海色嶺南寄與故人情

竹牀枴枕山窓下從此酣眠夢亦清

鐵笛為孟天暉賦

愛此輕圓鐵鑄成何須楚竹選孤生年多化作青蛇色
夜靜吹如彩鳳聲繡出碧花凝錯落冷含金氣發鏗清
最宜攜向君山去一聽仙翁奏月明

給事以馬乳貺就索詩

桐官載出素駝馬分得官壺給事家代飲酪奴寧許敵
蒸豚人乳不成誇肥凝曉露鳴夷草香帶秋風苜蓿花

長與詩翁消酒渴肯辭為客住龍沙

仙娥玩月圖為野雲陳氏題

仙娥微步下高寒獨立長松月滿山
汝影透明金背鏡
佩聲飛動玉連環
洗空碧海銀蟾冷
舞罷瑤階白鳳閒
不是丹青寄顏色
行雲無夢到人間

陳子平寄所作瓊花答謝

鳳在陽岡鶴在臯
相思空遣夢勞勞
簫吹夜月江橋酒
槎泛秋風海市濤
故國山川吳分野
美人詞賦楚離騷

瓊花新製人爭寫應使揚州紙價高

周漢長公府臨安故城二圖

今開元宮

主家樓觀鬱參差想見當年全盛時
宮草細侵行輦路苑花深覆泛舟池
瑤臺仙去塵生海甲帳神來風滿旗
好在畫圖留勝蹟五雲長護鶴笙祠

南渡君臣建業偏不堪喬木黯風煙
豈知白馬興王後又到紅羊換劫年
三輔黃圖空郡國六朝王氣渺山川
白頭開府歸來日應覽遺蹤一愴然

海樓為宛丘秋藏用題

不著闌干百尺高，難容此客卧雲濤。
深連厚地三千軸，迥壓神仙十五鼇。
日影夜生浮畫棟，珠光秋孕射霜袍。
醉來白眼看餘子，未許元龍氣獨豪。

太古樓為豫章傅道士題

羽客棲玄紫極宮，樓居三景自玲瓏。
游雲宛在洪荒世，探道元居恍惚中。
窻白夜生南浦月，簾高時卷上江風。
如何宴坐忘機者，千古塵緣一息空。

半村為傅處士賦

半距城闌半距村煙霞咫尺少塵喧
小車出市僕先路斜日下山人到門
兩岸花陰連第宅一川草色散雞豚
田家數里將迎慣時復相留醉酒樽

李克約餉臘梅并詩用韻答之

空谷佳人縞袂單淡黃衫薄護春寒
色欺隱者山中桂香逼騷靈畹裏蘭
鳥吐粟金妝處巧蜂留蜜滓鍊來乾
數枝乞與吟窓供溫水銅瓶自挿看

霍丘孫游武林湖山之勝詔之

千頃平湖繞郡城
畫船小槳盪春聲
紅酣花港風荷密
玉照梅岡雪樹明
煙月長留歌舞地
山川不改古今情
君行須到峰南北
為覓蒼苔石上名

懷臨川舊游賦以贈別戈直伯敬

擬峴臺前汝水流
因君還憶舊曾游
故人零落半為鬼
賤子蹉跎今白頭
詩思入江楓葉冷
鄉心隨雨雁聲秋
北齋居士知強健
為覓新篇慰別愁

暮春偶作

曹騰睡思酒頻中
潦倒吟懷語不工
燕子人家春復夏
楝花時候雨兼風
青林脫蠹成蝴蝶
白水鳴蛙抱活東
甚欲相從問丹訣
頂間朱橘幾時紅

草堂為胡晉仲題

姑孰城中林壑奇
幽人愛此結茅茨
垂窓已著盧鴻畫
繞壁惟書杜甫詩
花氣晴薰燒酒火
潮痕晚上釣魚絲
數椽有此真堪隱
不待山靈重勒移

贈相士陳巨山

老我寧甘徹骨貧多君見與掇皮真乖厓本是無情者
若水終為勇退人機外驪黃難著相眼中青白自如神
華峰太極圖猶在何日相攜問隱淪

贈地理家何玉泉

芒屨筇枝興渺然知君曾得異人傳經探玉髓青囊秘
山隱金精鐵鎖縣腹有丹光飛日月眼窮地脉入雲煙
幾時把袂神州路共看華嵩翠揵天

贈易學李所翁

易學如翁近所無
藹然聲問動江湖
著龜凶吉占如繇
爻象縱橫畫有圖
三卷秘書傳句曲
百錢卜肆隱成都
相逢欲問平生事
何惜春醪滿眼沽

贈第工任禮

牙牀銀甲不勝清
錦席瑤箏無限情
第一部中當絕藝
十三絃上有新聲
齊宮蟬怨時時咽
湘浦鴻來箇箇驚
宜向教坊供國樂
要須名似郭無名

玉笙為陸國瑞賦

曾聽仙人白玉笙飛瓊有譜學初成碧桃半向露中落
采鳳忽來雲際鳴瑟響洞庭空寫恨磬浮瀛海不傳聲
何如吹上扁舟去秋滿西湖月正明

長至日題

佳節蕭然無過賓餽餘觴豆自相親斗垂西柄半入海
梅發南枝先得春平日以文為事業老來惟酒是精神
莫論炊熟邯鄲未已是山翁一欠伸

元夜獨坐

九衢花月萬家燈憶在錢塘與廣陵
過去豪華春似夢
老來心賞冷於冰
蘇耽仙後還為鶴
房琯生前本是僧
喚取家人多置酒
只將寂寞付瞢騰

夜起


雞鳴不鳴山四更
月落未落霜滿城
起看北斗寒挂地
俯聽長河流有聲
今夕何夕耿無寐
千古萬古難為情
欲持心事出門去
哀歌坐待東方明

秋懷

山人底事縛微官來對關干首着盤匣印少開經雨澀
篋衣多敝入秋寒勞生沙漠隨征轂入夢江湖有釣竿
歌罷中庭待明發起看星漢正漫漫

世事

世事紛紛在目前故園無復可歸年吳東城陷仍為沼
滄海塵生欲變田鼠穴詎容銜寢數狶膏聊解運方穿
臣心有血才盈掬擬向天公罄一箋



蛭菴集卷三

欽定四庫全書

集部
蜨菴集卷
五四

詳校官編修_臣翟槐

中書_臣劉源溥覆勘

總校官進士_臣朱鈴

校對官中書_臣牛穩文

膳錄監生_臣黃鑫

欽定四庫全書

蛻菴集卷四

元 張翥 撰

七言律詩

殿試翥與讀卷官

老臣載筆侍金鑾自愧三叨讀卷官
進士擢科從古盛大臣考策得才難
芳年荏苒聞鶡鴒花事從容到牡丹
明發禁局當徹鐫文光高動五雲端

翰林三朝御容成
成仲冬朔把香前宮

嘉禧殿前初日高瑞光先映赭黃袍雲間瑞露收金掌
仗外微風颺彩旄黃鶴仙人周子晉碧雞使者漢王褒
禁園尚覺餘寒在未放春紅上小桃

甲午禮闈

白雪青天映日紅樓臺高下瑞光中佳辰正際新春晦
薄冷猶吹向曉風萬國衣冠朝北闕一時文獻集南宮
吾皇方此求賢俊載筆寧慚奉至公

九月朔迎駕大口

大駕今朝至上都期門罕畢已前驅錦衣照日環龍袞
翠蓋凌雲覆象瑜萬里山河開白道兩京宮闕入黃圖
縱觀父老心應喜知有天恩免過租

庚辰十月朔奉迎明宗冊寶至石佛寺明日壬
辰迎至太廟清祀禮成賦以紀事

寶冊香輿出法宮非烟御路曉濛濛仗齊劍佩千官裏
金奏簫韶九廟中宣室鬼神徵賈誼太常禮樂屬孫通
下臣有幸逢熙事散作恩波四海同

園丘禮成改直翰林敕書告廟祝版

捧冊先期籲太宮聖孫翼翼孝心同霓旌曉絢香輿日
鶴駕晴薰仗外風一代皇猷昭黼黻萬年寶厯卜濛鴻
舞階行見干戈戢並在穹祇叶相中

黼黻青城煥景光紫檀黃道藹天香鳳韶曲變初終奏
龍袞衣明上下章共喜聖時修曠典更從春享議明堂
吾皇飲福神靈畢却進公卿萬壽觴

直延春閣

蓬萊海上第三山仙掌雲間十二槃雞樹煙深殊窈窕
鳳樓天近自高寒銅壺傳箭聲相應紫詔封泥墨未乾
願祝君王千萬壽坐施雄斷濟艱難

送太傅丞相出師平徐方

南征諸將久無功丞相親勞出總戎虎士嚴兵屯玉帳
龍庭大宴賜彤弓萬年社稷收長算百戰旌旗得勝風
幕府如雲盡才彥荆徐指日捷書同

初度日

八十一翁烏角巾尊前才放自由身病須善藥休離手
衰借佳醪可養神誰謂仲連為俠士或傳方朔是仙人
行當小築西洋墅種杏栽桃作好春

癸酉初度真率會分韻

杏花風暖破春陰一笑幽齋喜盍簪人事萬端相聚少
酒杯百罰不辭深生辰值月方傳斗故國觀星正在參
多謝諸君為我壽滿牋佳句敵南金

乙亥初度是歲仍改至元

此生重見至元年白髮垂垂已滿顛仕愧買臣無印綬
歸思靖節有園田菜挑渚雪氷茸滑柑剝吳霜玉腦圓
終結一庵湖上去老來閒送佛前錢

病疔

肉黃皮皺髮毛枯一病支離困壯夫痛要小奴槌臂膝
冷尋破帽聚頭顱隣翁教誦禳灾咒道士來書禁瘡符
車轍馬蹄勞客問藥囊糜枕乏吾須

炎火寒氷忽暗投肺腸日與藥為謀擬尋畫史圖獅子

安得詩人咏髑髏月色自如閒
度夜蟲聲無賴亂吟秋
便當一起幽憂疾濯髮西風萬里流

自喻

狎鷗不下解知機蟋蟀先鳴能表微
人海無涯俱泛泛
佛天有相亦非非
試論前輩今誰在
欲問何山老可歸
嚴瀨磻溪各求志
豈關出處在漁磯

憶山中

買山晏塢近天根
遙憶春深正灌園
一樹爛紅櫻著子

滿林鮮碧竹生孫少陵只擬還韋曲安石端宜得謝墩
歸老會尋凌道士采芝燒藥了晨昏

感興

從來豪傑願風塵奮臂干戈肯顧身司馬諸王祇亂晉
祖龍二世竟亡秦祠旁鬼火狐鳴惡橋下天寒鶴語神
千古汗青留感慨山中輸與種桃人

憶廣陵舊事

乙未

君王昔在鎮南年賓客風流日滿筵上國旌旗分一半

層臺歌舞宿三千豪華遽盡悲離黍形勝空存慘暮煙
多少楚魂歸未得江流無際海連天

寄寶林同別峰定水復見心

寶林老子虎耽耽定水道人蒲作庵歸老尚須游越絕
尋師先擬到精藍越江碑在當重讀禹穴書藏會一探
我亦三生學環者定從佳處結禪龕

懷清源洞遊

時方
兵後

漫漫漲海際天涯萬里乘來使者槎紫澤重尋仙客洞

碧山常醉故侯家人多熟酒燒藤葉市有生蠻賣象牙
安得夢中時化蝶翩翩飛向刺桐花

寄副樞董搏霄孟起

王師前後壓瀛河萬里風雲入盪摩晉帥先宜謀卻穀
趙人終欲用廉頗枚銜突騎宵傳令鼓發轅門曉擁戈
共待將軍白羽扇歸來幕府上功多

寄野菴察罕平章

時攻
淄鄆

聖主中興大業難元戎報國寸心丹軍中諸將驚韓信

天下蒼生望謝安
露布北來兵氣盛
樓船南渡海波寒
擬將舊直詞林筆
細傳成功後世看

大軍下濟南

總戎十萬鐵鷄子
殪賊一雙金僕姑
白日照開華不注
亂雲飛盡大明湖
數年父老回生氣
千里山川復舊圖
已喜武威平汴兗
可傾東海洗兵無

哀孝子夏永慶

沒海救父父出
慶死年二十

翁已生全兒殞軀
投文我欲詰天吳
一時肝膽寧知死

萬頃波濤視若無骨
葬夜泉鯨穴冷魂歸故國
蜃雲孤自今孝子流風在直與扶桑水到枯

雲州龍門鎮韓母劉孝節卷

韓家門外立雙楹
丹染旌書照路明
此媼何如陶母傳
諸郎具是董生行
春泉躍鯉饒佳味
曉樹啼烏有喜聲
孝節從來貧始見
秦臺那用築懷清

真定王節婦習氏

青春忽掩鏡鸞悲
大節生全死不辭
夫目九泉無瞑日

妾身百歲有歸時天高地厚心如石女嫁男婚髮已絲
東觀只今多直筆為書青簡配桓嫠

上京睹陳渭叟寄友書聲及鄙人賦以答之

其詩

曰紫雲編

已刊四卷

忽憶江南古莊叟

自號

釣竿歸去拂珊瑚藥爐已熄勾

庚火書篋閒拋遁甲符欲與陳陶同啖鮓祇令張翰遠
思鱸不知別後詩多少刊到雲編戊己無

不見故人今十載平安喜得上京書顧我真吟紇干雀

羨君閒釣富春魚山房夜雨青燈外紫塞秋風白雁初
終擬攜琴隱湖曲一官垂老欲何如

授鉞

天子臨軒授鉞頻東南何處不紅巾鐵衣遠道三軍老
白骨中原萬鬼新烈士精靈虹貫日仙家談笑海揚塵
只將滿眼淒涼淚哭盡平生幾故人

左丞傅夢臣歸老汾曲賦以壽之

六朝名德仰巍巍未許家園久息機霖雨帝方思汝作

袞衣人更望公歸南山一柱標中土左轄三星拱太微
欲向賓筵頌眉壽寸心遙與白雲飛

王繼學廉使遷南臺侍史詩以賀之

天上歸來錦作袍幾陪春色醉仙桃銀河有路惟通鵲
碧海無山不戴鰲卿月又臨仙掌動客星偏傍釣臺高
廣陵此去金陵近擬拂塵埃望節旄

送西江胡允中之桃溫萬戶府學正

遼水窮邊年蓋東鎮人今始識儒宮詩書直化三韓遠

文軌須令萬國同
隼度塞雲秋有雪
鼇翻海浪晝多風
知君回首神州路
一髮青山落照中

余伯疇歸浙東簡郡守王居敬

四明游客住京都
旅舍青燈照影孤
家信十年黃耳犬
鄉心一夜白頭烏
却攜長鋏辭金水
直挂輕帆到鑑湖
為問蠡吾王太守
別來安穩有書無

寄達兼善經歷柯敬仲博士

心憐旅寓各西東
長憶樽前笑語同
故國魚龍滄海上

仙家雞犬白雲中百年人物無多見一代文章有至公
等是不禁惆悵事鬢絲黃葉共秋風

宗人鳴善將還武昌詩以叙別

武昌城中官柳陰廣陵行客動歸心衣冠南渡悲豪傑
江漢東流變古今多病馬卿游已倦能詩杜老律尤深
洞庭明月如相憶為寫清愁入楚吟

次倪元鎮張伯雨錫山倡和之什

鶴在青林鳳在阿騷人行處有吟窩西風落木秋來早

南國浮雲入暮多，欲賦朱華臨鄴水。
可堪白芷怨湘波，期君不負湖山約。
來聽吳儂欸乃歌。

答謝看雲宗師壽帙綺段之贈

自信平生有道緣，頻煩白鶴寄瑤箋。
錦分帝子機中織，詩入真人誥內編。

余詩亦在刻中

弱水蓬萊三萬里，慶雲閭闔

九重天。擬抽玉刺從飈御，一到環樞問列仙。

送涂茂才北游

黃河十月已流冰，暫解行裘駐廣陵。
送旅壯懷銷北斗，

故山歸夢入孤燈，千金燕市方求馬。萬里天池欲徙鵬，曾是公卿有知己。孝廉船上覓張憑。

答韓伯清練溪見寄

久慚簪紱趨文館，擬問田園歸武林。慷慨謾論當世事，衰遲空負壯年心。忘機白鳥何妨狎，投老青山不厭深。聞道練溪春酒熟，期君苔上共登臨。

醉鄉

半屬華胥半酒泉，封君惟有麴生權。觥籌席上無多地。

風月壺中別有天，千日夢醒如隔世。
四時春盡不知年，從來此處藏身好。
容我神遊太古前。

送曹鑑克明自浙省員外遷湖廣

上流形勢控荆揚，撾鼓飛帆過武昌。
幕府一時登傑俊，朝廷今日際明良。
南樓詞翰題鸚鵡，北斗旌旗下鳳凰。
好折楚芳遙寄與，美人秋水遠相望。

越僧無涯號棲雲乞賦

上方何處但聞鐘，深護林扉翠幾重。
卧冷衲衣侵片石，

行隨錫杖度千峰松晴每下安巢鶴潭暮時留聽法龍
更欲移禪沃洲去微茫巖洞不曾封

懷上饒祝蕃遠時為建康學正

聖王端拱致時平妙選羣才屬汗青一代彌文縣日月
萬方同軌走雷霆敢希太史抽金匱更待中郎寫石經
出處與君俱有道不煩猿鶴謝山靈

送歐陽遜老從謙之湖間照磨

白雲親舍在湘東懷牒歸來畫錦同賓幕盡趨元帥府

朝班舊引大明宮
劍橫巖客南樓日
瑟罷湘靈北渚風
何處登臨最相憶
江籬秋碧畹蘭紅

送王季培還揚州兼述所懷

遠憶淮南后
土祠君歸今已發
瓊枝好尋月下吹簫處
猶及花前把酒時
錦瑟金錢餘舊伴
烏絲紅袖有新詩
故人相見如相問
老盡當年杜牧之

江充州叔志去思碑

使君有道是民師
惠政長留去後思
秀麥不專稱漢史

甘棠直欲繼周詩
馴桑有雉童俱化
攫肉無烏吏絕欺
東魯自今應紙貴
一時爭打兗州碑

臨川留別宜黃樂杞楚材

當年攜酒杏花春
同是江西榜上人
歲晚異鄉為客久
夜來歸夢到家頻
鴈聲孤館迢迢雨
馬影斜陽漠漠塵
悵望與君江海別
幾時高誼復相親

寄答張五丈師夔明府

時在蒲田

舊令龍陽有去思
移家喜與土風宜
人傳張籍妙樂府

我識王維真畫師
火米夏收畬稻早
海椒春放瘴花遲
客槎不到天無鴈
賴有輜軒可寄詩

寄歸學士彥溫

時寓夏縣

老筆文章史漢間
喜聞華髮映朱顏
司空舊隱王官谷
開府今稱庾子山
一色黃茅丹竈火
十年清夢紫宸班
與君歲晚須相見
久辦歸思疏乞還

寄韓文璣與玉

自驚六十八年身
老病蹉跎又見春
京國歲寒稀雨雪

江淮兵久尚風塵鄉書屢絕親知遠官俸常空僕馬貧
只憶練溪韓與玉封書寄與重傷神

春闈和周伯溫韻呈同院

鼓角聲中漏未終衣寒官燭屢銷紅百年海嶽回元氣
一代文章有古風仙掌露溥金沆瀣觚稜雪散玉玲瓏
祇慚白首河汾客得與羣賢此會同

正月九日夜雪甚寒

雪後西山照眼青早寒微霰又飄零昨非未必今皆是

衆醉何由我獨醒學篆每朝臨碧落存神長夜養黃庭
若爲喚得瀛臺侶相與吹簫上杳冥

長至後一日小集張氏小軒留題

金殿當頭是廣寒闌干高倚五雲端山銜落照虹光濶
海颺長冰玉氣乾僊客上昇惟控鯉月娥來舞每乘鸞
更須載酒春晴日萬里風煙快一看

十月望夜食既

戊戌歲

翳翳冰輪漸欲無滿城鐘鼓競喧呼明銷魚腦渾應減

食盡羹腸正可剗
后羿藥靈知不死
臣仝心切望全蘓
夜闌失喜清光滿
一片霜風凍玉壺

闕題

席上屠蘓歲歲同
只憐最後飲哀翁
半生客路江湖裏
十月春愁雨雪中
黃道雲消晴見斗
青陽氣轉曉占風
欲題采帖無佳句
思繞蓬萊最上宮

寄郊九成即事自述

豎儒無術善飛鈴
鏡裏形容亦自嫌
憂世不堪才力弱

告歸方畏簡書嚴風沙慘淡寒吹帽星斗光芒夜近簾
此際思君倍愁絕何山容得老夫潛

寄成居竹

時張勉已受詔而陰襲揚州

戰骨填溝塵滿城尚書歸說使人驚方期渤海民沾化
豈意平涼賊畔盟何日皇天知悔禍中原故老望休兵
傷心揚子洲邊月忍聽江流是哭聲

高沙失守哭知府李齊公平

高郵自昔號銅城一旦東門委賊兵殺氣倉皇迷野色

怨魂嗚咽泣江聲廣陵瓊樹春仍在甌社珠光夜不明

白首故人悲趙李臨風唯有淚縱橫

參政趙伯器死泰州

潼關失守哭參政舒魯杰存道

十月三日天地昏將軍扼賊死轅門火飛華嶽三關破
血浸秦川萬馬奔望越伍胥方扶目戰箕先軫不歸元
北風吹盡英雄淚倚劍悲歌一愴魂

寄答程彬文中時避慈溪

往年使過慈湖上風景依稀可畫傳紅葉樹藏秋水寺

白頭僧渡夕陽船
竹林雨後山多筍
漁浦潮來海有鮮
藉是縣公能愛客
不妨酬倡酒樽前

靜對孤燈思往事
偶聞疎雨落寒牕
愁邊白髮三千丈
夢裏青山十四雙
蜀魄有聲疑訴國
楚招無此憶沈江
只因詩思緣君去
吟斷遙鐘已曉撞

食粥

病齒入冬便食粥
瓦瓶煑豆給晨庖
鄰人新酒賒來醉
道士奇方借得抄
鴈喜隨陽還北鄉
鵲知避歲已南巢

故園我亦無歸計且作齋居蓋白茅

聞歸集賢遠引奉簡一章

時呂左丞歐承旨司尚書繼亡

故舊相看逐逝波思歸無路欲如何將軍每嘆檀公策
朝士徒悲穆氏歌南海明珠來貢少中原健馬出征多
先生自說將高舉不遣冥鴻到罽羅

題馮士啟士可藏書堂

不惜黃金為買書要令絃誦被鄉閭聖賢事業千年上
經史文章萬卷餘借送詎論鵠有酒收藏長愛蠹無魚

他時許下成精舍嶽麓匡山恐未如

分韻瓜步送司執中之江西憲府照磨

山前古驛草蕭蕭候吏沙頭候畫橈采石晚風人渡急
歷城煙樹鳥飛遙時平烽火沈江戍市早魚鹽散浦橋
目送征帆慢相憶祇將離恨寄回潮

分題投書浦送沙彥文架閣之江西

高人豈作置書郵盡棄函封向石頭故迹不隨煙草沒
遺風長與大江流悲臺鷹下川雲暮別國龍回岳雨秋

君過渚傍須艤棹題詩相寄莫沈浮

分題若邪溪送別胡一中允文錄事之紹興

五雲溪水碧縈灣純浸蓬萊郡裏山金躍冶鑪龍已化
箭空仙的鶴長閒棹歌洲渚芙蓉外人在樓臺罨畫間
吟賞總輸賢錄事樵風日暮送舟還

寄題睢陽張文照存齋

之子山房結數楹靜無塵累已櫻寧此心炯炯同千載
吾道煌煌有六經雨後儀型山更好牕前意思草長青

工夫要在存存熟便是齋居座右銘

題四皓商山圖

兵塵瀕洞遠函關不到商於六里間赤幟頻傳秦楚蹶
白雲自與綺園閒龍蛇陸起知何在鴻鵠冥飛竟不還
千載高風無復見空餘芝草滿空山

玉山墨工魏元德名一時贈之以詩

魏郎應得庭珪法未數松泉與雪堂萬杵熟膠香入劑
一螺點漆黑生光掄材合致圖書府留價爭傾翰墨場

我有詩囊須剩襲草玄歸去老山房

松泉林嵩號雪堂吳宇號

山友為金閣山田道士作

山人愛與山為友住得山前地幾雙為納白雲長掃室
欲延青嶂別開牕嵐中筇跡粘苔磴風外琴聲瀉石缸
應是烟霞數仙侶月明時復下旌幢

望江

是歲合
越飢

寒潮已退大江空不見來鷗與去鴻半嶺綵霞纏落日
一川紅樹照西風魯連蹈海英靈遠王粲登樓感慨同

徑欲投竿會稽石得魚為飽浙河東

歲晏奇寒

凝坐羶毬類凍蠅霜風吹折布衣稜
爐翻宿火隨灰陷
杯覆燭湯到地凝虎豹凍埋山盡雪
魚龍寒宿水連冰
濁醪最解強人意吟短西牕一寸燈

寄答莫維賢景行

故人音問久相疎忽寄新詩良起予
半卷長箋歌枕讀
盡拈佳句繞牕書此生館閣嗟留滯
何日兵戈見掃除

歸覓南屏山下隱酒杯茶竈共閒居

答馬易之編修病中作

喜君近疾已平安楮帳綿衾且避寒飯顆任嘲詩骨瘦
糟丘能遣客懷寬天街鐘動朝初罷海國書回歲又殘
忽訝衰翁不相問北風吹雪正漫漫

寄成居竹黃舜臣

歲月崢嶸春又來歸心遙在故園梅十年厭見風塵惡
萬事徒增耳目哀大漠平鋪沙雪去遠山直枕海雲開

近懷欲報成夫子強起題詩對酒杯

一見君詩倍黯然
薊南湖北各風煙
故人漸似星將曉
塵世真成海變田
桂在謾吟招隱曲
鶴歸還記去家年
虎丘山水知無恙
有待先期置酒泉

至日微雪家人盡上冢獨步小酌

忽忽又逢長至日
此心寒似塚中灰
尋思一日老一日
得飲數杯還數杯
鵲知太歲改巢去
雨被北風吹雪來
醯醢羞駕良不惡
餽餘聊遣凍顏開

送布延彥仁都事還蜀無東時文可郎中

送君一騎發長安王事方殷肯避難使者好尋巴道路
詩人多勒蜀巖巒江來灌口聲初放雲接峨眉翠不乾
為報郎中勉勛業遠音時遣破幽端

題枯士朱槧方畫五松

隱君業在枯溪東種就長松倚翠空一夕蛟龍起春雨
滿山鱗甲動天風也知造物生來異未許煙霞畫得同
想見青田舊巢鶴時時來唳白雲中

吾廬

吾廬幽似野人家時倚南軒玩物華亦有君臣槐腹螳
也能鼓吹沼中蛙隣翁來送新篘酒堂吏求抄舊草麻
早晚乞骸尋舊隱不妨高卧傲烟霞

歛汪希仲罕代自雄新二州還都話其風土為
賦

越鳥巢南漲海東地兼夷夏氣惟雄洞深屋壘層厓上
瀧險船行亂石中春樹濕雲生桂蠹瘴節經雨落沙蟲

宦游最數蠻荒惡羨子歸來面更紅

病起偶題

丁未

閱世悠悠八十餘此身天地一蘧廬
季鷹只愛生前酒
司馬空留後世書
野散未歸鳴澤鴈
水煩徒噉在淵魚
可堪落風塵裏
兩鬢霜毛頓覺疎

飲故相國宅

相君池館舊撫訶今日還容野老過
裂地商於真已矣
積金郿塢竟如何
胡僧漫演寅朝偈
女鬼空悲子夜歌

起向春風酌盃酒青蕪滿地雨紅多

監中暮歸

時廣帥獲鰐魚放之潞河滿林木皆梟鳴日夜不止已亥歲也

扶桑銅柱若為標南望兵氛久未銷秋水漲河初放鰐
晚煙籠樹盡鳴梟枕戈未睹棲於越舞羽曾聞格有苗
河北諸侯總戎翰好宣忠力佐皇朝

次韻閩僧秀崑寄竹溪僧

峰北峰南法界中杖藜來往夕陽鐘時過花洞逢游鹿
夜呪珠臺放釣龍七字詩才清似水三生骨相古於松

羨師方外全無事只箇蒲團又過冬

望入南雲無去鴻憑誰持餉一瓶空詩來萬里燕臺下
寺在三山治縣東戲瓦空中惟見水挂旂窗外自搖風
我今也擬辭簪紱去作巖居三老翁

送監生聶讓省兄山後

生父死
王事

書劒翩翩送子歸原頭相見脊令飛北風關路雪雲暗
落日客亭烟火微血立忠臣頭上髮線留慈母手中衣
老夫唯有銷兵望早遣平安到虎闥

東坡淮口墨蹟卷後有黃策詩

策號隨緣子

潮落潮生沙岸頭
布帆來往幾經秋
山川如故人何在
天地無情水自流
敗壘荒墟非昔畫
野煙寒照總新愁
只應千古清淮月
曾照東坡此喚舟

壽許集賢可用

予同年
少七月

圭塘諭德真壽星
斑衣戲舞滿中庭
同年笑我雌為甲
上壽看君老復丁
壺有仙公新授藥
廚留長史舊傳經
他時若許相依住
願割西山一半青

看君才氣曼無雙往往賓賢鎮海邦未報美人青玉案
且乘壯士碧油幢喚船椰葉迷蠻驛對酒椒花映客牕
別後平安須越便鴈飛不過嶺頭龍

送貴溪彭伯時教授之高州蒙古學

都門柳色綠紛紛惆悵南園此送君
頗海驛程須給傳國朝字學要同文
鼓來野廟迷蠻鬼火燎山田落瘴雲
藉有桺榔與藤酒冷官聊復送朝曛

樂平劉復初隱居四詠

東臯南畝雨新晴杏花欲開萑葉生田婦蒸藜來午餉
鄰翁荷鋤趁春畊烏犍引犢村村出布穀催人處處鳴
歸與兒孫共閒夜一牕燈火讀書聲

右耕田

泱泱寒流底處尋但傳幽響出空林石根雲竇元多罅
松籟風簧共一音醉夢聒醒春枕熟詩懷清徹夜牕深
中郎別有清溪曲更寫潺湲入素琴

右聽泉

釀法傳將道士家春醪一味采松花常時野坐開新瓮
幾度山行載後車忤客有誰焚醉日學仙何處飲流霞

明朝又覓南鄰伴還汲清泉洗石窪

右飲酒

漾漾清波浮紫鱗一筇閒倚樹邊身我疑濠上漆園老
誰識江頭漁丈人細草留連還可藉野鷗來往自相親

此中正得悠然樂何用扁舟把釣綸

右觀魚

成居竹有詩見寄因郊九成行用韻答之

歸隱山林嘆未能強支世故力難勝少狂欲作追風驃
老退還如被凍蠅客賦有愁逾萬斛兵廚無酒可三升
與君為結東家社珍重衰年護寢興

送燕山楊文周之汾州教授

關河迢遞入汾陽
暑雨初收陌樹蒼
名士多為文學掾
此州今有狀元坊
鴈來霜塞秋聲急
鳥去煙臺野色荒
試問西河讀書處
因君石室重輝光

送草牕講師周善京還九江太平宮

萬疊匡廬紫翠開
太平宮館即瓊臺
九天使者雲間下
五柳先生社裏來
杏樹春陰渾滿院
桂花涼露不盈杯
遙應鶴侶相望久
吹取樓頭鐵笛回

許編修克敬歸平水奉寄王秘監先輩

憶昔先生致政時至今留在十圖詩古來賢達知幾早
此日山林問舍遲故國衣冠多草莽中原郡縣半旌旗
白雲汾水秋風外目送歸鴻有所思

九日燕允孚森玉軒醉中感懷

不見江南信使來菊花應傍戰場開風塵渺渺家難問
節物匆匆老轉催把酒多無今日醉

坐中客此語
有足動心者

登高

只益寸心哀白頭一覺湖山夢誰料繁華有劫灰

會試院泰甫兵部既答和拙作且示以佳章僕
以汨於校文遂稽貂續仍韻見趣所考既就

格輒綴四首錄奉一笑

堆牀朱卷考初分衛士傳呼夜鎖門
雲駕已多東野馬
搏扶應有北溟鯤
熟衣乍換寒猶薄
倦枕纔憑睡易昏
願向斯文求俊乂
大廷行對帝王尊

樓頭疊鼓已三嚴
起聽秋聲滿四簷
山葉落頻風繞樹
露蛩吟苦月當簾
煙寒銅獸催香換
漏促金壺報箭添

笑我原無食肉相只思蓴鱸薦吳鹽

勸眼空花漫不分偶隨羣彥集金門扁舟只擬追張翰
一壑還期置謝鯤楓葉舊詩多冷落梅花歸夢幾黃昏
與君此去如休暇莫厭相過共酒樽

詩律輸君敢鬪嚴強摩老眼傍風簷鵲袍夜散遙持燭
席舍朝開盡撤簾久悟物機忘出入時存神火驗抽添
明當喚取彈箏手與唱新聲阿鵲鹽

故御史王楚鰲元戴為臨川王伯達三畫求題

王館
賓也

雙鳳仙人茅作屋五雲閣吏繡為衣寫將瀟灑滄洲趣
留待風流二老歸歲月無情遺墨在江湖多事宿心違

寒藤古木江西道惟有當年白鴈飛

右雙鳳山居圖
山在臨川五里王

自奎章典籤為
旁使故云閣吏

罨畫溪頭春水波美人蘭棹遠來過杯如賀老稽山酒
曲有吳兒小海歌樓館雲晴空翠濕汀洲花暗夕陽多

只今粉墨餘高致愁絕樵風冷薜蘿

右山陰春霽圖
時憲巡行越州

小吏堞前煙水空
淮山無數直叢叢
使君援筆寫秋色
舟子唱橈乘晚風
幾處漁家依落木
半汀殘照下飛鴻
白雲望斷仙遊遠
應在蓬萊碧海中

右萬港秋汎圖
時為淮西僉憲

雪中梁師孟叔原餉渾酒
小飲閒窓偶成一章
歲事蕭條雪擁門
家人隨分具盤飧
竈頭餅軟團團白
缸面醅新盎盎渾
萬竅風聲皆地籟
一窩春意自天根
老夫只待干戈息
歸問西湖水竹村

送僉元魯降香南岳南海

天開朱岳奠炎方地入南溟接大荒使者肅修時典禮
神明宜護國封疆仙臺雲散峰巒碧瘴嶺春回草木香
珍重詞臣致誠禱願消昏癘降休祥

送景初漕史還平江各賦一詩寄吳下諸友

怒浪蹙天摧漕舟疾風吹雨黑中流海神躍馬火明滅
龍伯釣鼇山蕩浮安得靈槎通漢使斷無奇藥采瀛洲
丈夫政事經艱險不負平生亦壯遊

景初押糧至咸山
遭風既沈來六萬

石得小
舟以免

我憶枯山老徵士卷霧飛談那可當高致何如漆園吏
幽居真是鄭公鄉未能即去楚氛惡每一相思雲樹長

欲覓雙魚問消息越來溪遠水茫茫

鄭德明

匡山道士軀幹小豪氣直壓香爐峯池邊呪劍出金虎
峽頂放船飛白龍老我每推詩俊逸何時相見話從容

散仙萬一煙塵外為報巢雲若箇松

于彥成

近報崑岡亦被兵知君撫劍氣崢嶸夫差强弩風生海
姑蔑戰旗雲繞城天詔屢傳寬宥下王師行見掃除平

草堂無恙玉山好我欲南轅尋舊盟

頤仲瑛

汶上早行圖上清張道士寫

絳節前驅海日生川迴已見汶陽城數峰曉翠和煙濕
千樹春紅照地明原隰使華來煥爛河山風物入經營
憑君更寫千巖月與聽鸞笙夜夜聲

白鷹

愛此精神顧盼雄扶輿遙隔海濤東偶含金氣翎如雪
直上秋雲骨有風條鏃五方禽獻後錦貂千騎獵園中

平原側目多狐兔安得真拳一擊空

九月二日揭曉僕以朔旦始得閒復成二詩錄

奉泰甫侍郎思齊御史本中都事道明敏文

伯崇有志諸寮友

解送諸君藻鑑分棘圍明發喜開門荆人自許山多玉
莊叟虛談海有鯤過鴈風高秋索索護霜雲薄曉昏昏
鄉來曾預春闈考猶記君王賜上尊

西風漸急早寒嚴曉露俄晞日在簷滿鼎松聲煮活火

半鉤花影捲疎簾菊黃又報秋期近髮白空驚老態添
未得山中覓茅屋去修丹竈養紅鹽

庚子元日早朝大明殿小飲自述

玉殿齊班對正衙退朝冠蓋滿京華青天徹曉無雲氣
黃道回春轉日車閒染彩毫題帖子喜將綠酒泛椒花
老身只待承平了攜取來書問故家

仙興

騫林樹樹玉成圍皓鶴彩鸞中自飛玄石山人千日酒

上清仙子六銖衣道心不動方歸樸物化無方總入機
自炷蕪香明月夜露壇東向禮靈威

自悼

十二樓空月自明一圓一缺總關情每從畫裏瞻瓊在
復向詩中記受生魂不歸來悲楚些夢還驚覺厭秋聲
遙知別鶴離鷺思只在芙蓉海上城

夢中常苦不分明天上人間各有情桃葉竹枝無限意
靈芝瑞草可憐生若蘭謾織回文字鸚鵡猶傳響板聲

欲得近音何處問風煙遮斷武林城

病中

小兒舞袖學齋郎大女笑看傍鼓簧狂客有時來獵酒
老夫無事坐焚香前家後家雜歌哭南斗北斗相低昂
病卧經旬不出戶牆角青青春薺長

遣興

七十蛻翁衰病餘一室儼若維摩居孔方無神可使鬼
毛穎已秃不中書江湖天遠道塗斷鼓柝衝寒風雪初

糠粃明年恐未飽欲求何地托吾廬

至後暴日

火煖牀擁病翁遣懷篇翰底求工悲歌學士徒能壯
學坐禪僧要自空鷄旦猶鳴天有雪爰居已去海無風
只留一段思鄉意不見詩中見夢中

悼亡日

是早題畫梅一幅夜
夢梅花盛開有感

剪水裁雲聚作花直教顏色冠芳華一雙仙子玉條脫
三尺天家香辟邪南國好音將過鴈西牕殘夢已啼鴉

年年此日傷春思忍把歸心賦落霞

九日書似北山上人

先夜
雷雨

老年尤惜過芳時籬下黃花值閨遲夜雨有愁如濕絮
秋風無髮可吹絲勞魂數數還鄉夢往事茫茫感興詩
滿腹精神渾減盡一杯誰與共襟期

中秋望亭驛對月代祀北還

月色滄波共渺茫驛亭襟坐看湖光仙家刻玉青蟾兔
帝子吹笙白鳳凰蘆葉好風生晚思桂花清露濕空涼

回槎使者秋懷濶倒瀉銀河入酒觴

春日小軒獨坐

江南梭筍正時新滋味還思養病身
暮雨過雲初有電老鶯啼樹已無春
虛名晚合徒多累同輩生存僅數人
淨掃虛軒炷香坐只將篇什擬心神

清明日杏園獨坐

底事東風大放顛為花渾廢夜深眠
賞心不有閨三月老眼應虛春一年
歌舞盡傳天上曲笑談同是酒中仙

歸時更愛東城道月在秋千影外圓

長至日偕諸友遊故宮

皇天有數混南邦組練長驅萬里江內井龍沈軍檄在
西郊鬼泣帝車降河開故道穿宮籞殿鎖秋塵暗佛幢
欲問興亡遺老盡晚風鈴語自挺挺

中秋雨明日晴明玩月有作

今夕清光不負公更無雲氣礙虛空晴遲一日秋纔望
看到三更月正中蟾兔影寒天下露魚龍魄動海生風

故人別有蕉杯約未放扁舟一鶴東

蛻菴集卷四

欽定四庫全書

蛻菴集卷五

元 張翥 撰

七言律詩

雪中早朝

北風吹雪浩漫漫
曉出津橋立馬看
春入上林花樹早
水連平地海波乾
金城萬雉微茫濕
月闕雙龍顛
履寒今日天顏知
有喜紫宸朝下散千官

過李陵臺

分教
上京

路出桓州山纓迴僕夫指是李陵臺樹遮望眼仍相弔
雲結鄉愁尚未開海上羝羊秋牧罷陵頭石馬夜嘶哀
英雄不死非無意空遣歸魂故國來

喜雪簡社友

廣陵

今朝臘日初飛雪一白先期報歲豐坐見洪荒還太古
信知造化自虛空詩情畫意天機外和氣歡聲帝力中
便欲訪君僧舍去凍泥晴滴阻西東

清明日大風雨

陰霾連日惡風生老去愁多骨亦驚天色昏昏轉黃濁
春光冉冉又清明隣家醪酒初開瓮游女香車不出城
須為杏花賒一醉誰家園裏有鶯聲

西興渡

攜家迢遞過西陵江霧微消海日升帆影畫驚沙上鴈
船聲斗落岸頭水果園霜後初分橘漁浦潮平各下罾
歲晚不思行路倦剡中佳興正堪乘

送春答何高士

湖山不見暮雲渾楊柳風寒早閉門情在舊游花歷歷
酒淹殘睡雨昏昏種桃道士今何處采芣騷人不返魂
欲識傷春無限意杜鵑枝上有啼痕

夕次楊村

煙中帆影落舸艤繫纜沙邊已夜過風驟數聲來海樹
月移半暈入天河得歸始覺形神王望遠空留感慨多
坐聽舟人語明發蘆花秋水正增波

清明雨晴游包山龍華寺過慈雲頗

當年玉輦此經行古寺猶題扈從名
龍鳳識空山氣歇
馬牛劫換海波平野桃著雨春紅落
嶺路埋雲濕翠生
日暮人歸煙樹黑飢鼯啼雨上宮城

雷火焚故宮白塔

辛未二月十三日

聲聲起蟄乍聞雷驟落千山白
雨來恐有怪龍遭電取
未應佛塔被魔灾人傳妖鳥生
謠火誰覓胡僧話劫灰
豈復神靈有遺恨冷煙殘燼滿荒臺

中秋樂陵驛玩月

考官李狀元
王助教同行

西風吹盡馬蹄塵涼夜中庭暫解巾華月團團生兔腹
黑雲片片散魚鱗鬢毛老去如黃葉詩思秋來滿白蘋
樂飲與君須達曙舉杯相屬恰三人

家居九日

時余祝子類值
酒禁丁未歲也

病餘瘦骨不勝秋早起驚寒已索裘安得酒酬佳節醉
從教花為老人羞螟蛉有子寧嫌祝蛺蝶無知底用愁
却笑江湖舊詩客淒涼猶憶少年游

喜雪答鶴齋薛逸人

曉雪初飛應歲華因風吹起整還斜石田不種皆成玉
瑤界非時自雨花道士擁爐衣類鶴麻姑送酒髻如鴉
懸知此際神遊處只在蓬萊海上家

七月二十七日書所見

杏花樹底血猶紅一宿星痕雨洗空鳳闕追班聽帝詔
羽林坐甲衛皇宮天官占候徵玄象國士精誠貫白虹
引領雲間望笙鶴朝來佳氣已蔥蔥

辱井欄

為御史
所破

好事能收斷石存摩挲堪憶古雲根樓空野燹鐘何在
宮沒寒蕪井已眚古篆半留欄上字妖姬猶有墓中魂
試捫凹處殷紅濕不是胭脂是血痕

十一月六日大明殿賀清祀禮成

大明宮殿彩雲間花底微風響佩環陞戟九重周虎士
御筵咫尺望龍顏犬牙磐石諸侯國豹尾鈎陳百辟班
漏下五門朝退晚日邊佳氣滿西山

存道元帥師宗感時及陡遡山竢刀寨入貢次

韻二詩送歸闕戍

徼外頻傳羽檄飛將軍三起著戎衣空山狐兔無藏窟
平陸龍蛇有殺機已見趙佗知漢德更令孟獲識天威
此行整頓蠻荒了箐雨瀘煙好賦歸

羣蠻連歲闕滇中陡遡山前喜挂弓萬里籌邊頻却敵
半生憂國早成翁塞垣烽火方無警幕府文書已上功
奏賦歸來五雲閣漢庭不獨數嚴終

送謨侍者還江陰

禪衲無塵錫杖青一龕天竺更南屏楊枝徧洒瓶中水
貝葉時繙笈內經舊業池菱秋漠漠歸舟江樹曉冥冥
今朝又作蕪城別何處鐘聲入夜聽

寄陳敬初郊九成

憶昨閨門綰柳條遠煩相送過楓橋夕陽陌上東西路
春水江頭早晚潮老境此心惟白社英年何處不青霄
詩林別後應俱進時遣郵筒慰寂寥

寄俊上人

不見俊公今十年武林留偈竟茫然
苔溪寺已空塵劫蒲室燈還有別傳
晒衲石根隨夕照題詩竹裏濕秋煙
何時近一牛鳴地老去山中伴夜禪

寄智及上人

故人遠在越江南何日相尋過海帆
少借禪房一十笏全繡經藏五千函
寒爐撥火宜煨芋夜月裁詩定倚杉
擬結願香歸未得碧蓮花老補陀巖

寄見心上人次韻

自入赤墀青瑣間舊遊禪侶亦闌珊青山只憶招提境
白首初辭供奉班馬為空羣猶蹻蹻鳥能求友自關關
終期一舸相尋去知在姚溪第幾灣

見說錢塘別築城淒涼風景若為情湖堤柳盡曾游路
石壁苔荒舊刻名老我無能如燭武何人可飲勝公榮
沃洲勝會還容續即擬山中隱計成

懷翟文中

君留越甸長懷我我在京華幾夢君佳句每從愁裏得

遠書忽向病中聞
船來海口人爭岬
兵滿淮南火照雲
今日臨風倍淒斷
白頭清淚共紛紛

江山覽勝樓

白雲東南相蕩浮
中有隱者之飛樓
千峰影落華蓋晚
一水寒通彭蠡秋
鮫人機杼或聞響
山鬼窟宅疑藏幽
為問仙家借黃鵠
我欲題詩來上頭

寄別陳渭叟

空山花發春事幽
道人結屋居上頭
胡麻隨水有時得

杏子成林誰敢偷金銀氣雜丹光現澗壑響帶松聲流
寄語黃鶴一相別獨立蒼茫歌遠遊

遊天竺寺

石梁濺水濕蒼苔陰洞傍穿澗底回殿閣金銀從地湧
山林圖畫自天開龍隨僧到分雲住猿任人呼下樹來
遊興未闌斜日盡馬頭呼酒尚徘徊

西湖之西天竺深天香滿風多桂林老猿引子下高樹
流水與雲來遠岑上方已變劫灰黑古碣長帶秋嵐陰

清輝娛人且歸去後夜明月來重尋

通玄觀

內侍劉敦修真結菴於此高宗御書通玄二字榜之賜名能真

羽蓋翩翩下九重江鄉秋晚滯仙蹤
信傳真府憑青鳥劍舞瑤臺走碧龍
頃刻風雲興五嶽須臾雨澤慰三農
殷勤欲問參同契雙舄遄飛未易從

題張外史馬塍新居

窈窕丹房古礪阿長松脩竹繞層坡
桃園隱者時相遇茆洞仙人夜或過
沆瀣杯寒供曉食青冥笙響答空歌

白雲浮出池痕滿知是龍泓宿雨多

登六和塔

江上浮屠快一登望中烟岼是西興日生滄海橫流外
人立青冥最上層潮落遠沙羣下鴈樹欹高壁獨巢鷹
百年等事豪華盡怕聽興亡懶問僧

上清薛茂弘虞內翰以鶴齋號之為賦

羽人新得虞翁號歸築衡茆並翠微丹室有風鳴夜帳
斗壇多露濕秋衣畫中作者薛少保華表當年丁令威

直擬身形鍊相似玉笙吹上白雲飛

登金山吞海亭了翁韻賦

危亭突兀戴鰲頭俯視滄溟一勺浮
龍伯衣冠藏下府
梵王臺殿起中流扶桑夜色三山日
灩澦江聲萬里秋
老我惜無吞海句但磨崖石記曾遊

寄成居竹隱居

青袍朝士困京華此老蕭閒竹滿家
山壓窮愁詩強項
海枯渴肺酒槎牙商巖未採芝如草
彭澤將歸菊有花

孤負江頭理漁事短篷春雨夢滬沙

題唐子華畫王師魯尚書石田山房

秋水橋邊紅葉林數家茆屋傍青岑岡頭種玉朝煙煖
隴上鋤雲宿雨深摩詰輞川宜入畫少陵韋曲自成吟
束薪歲晚來同煮應許山中道士尋

賦中書左曹小瀛洲

東曹地迴集名郎宛是仙家紫翠房閭闔上通天咫尺
蓬萊移出海中央金波日暖浮鵝鵲玉樹春濃下鳳凰

幾度夢回清夜直此身如在五雲鄉

三月望日遊虎丘寺題小吳軒

海湧峰前雲樹盤
佛宮飛閣出巔巔
虎來古冢金精白
龍卧秋池劍影寒
禪老說空留壞石
鬼仙題雨下虛壇
憑高不盡登臨興
更借西山晚翠看

題舒嚕存道元帥平師宗三州卷後

不用牙璋遠出師
將軍憑軾下邊陲
楚酋爭軟金盤血
漢使高懸玉帳旗
司馬文章傳太史
武侯威略震南夷

只今父老蘭滄上擬刻寧靈第一碑

送李孟端奉祀天妃祠北歸

萬里函香出漢廷
楚江南下越山青
祠光夜現天妃火
騎氣秋瞻使者星
三島鳳麟環碧海
九關虎豹隔青冥
君才宜掌絲綸美
為述文章襲六經

虛齋贈四明王道士

高齋聞在荔枝林
曲几方牀宴坐深
大道無形元寓器
至人於物不容心
三山雲氣通寥泲
一室天光入照臨

我欲壺中收藥去石田瑤草共相尋

吳江

坐倚風檣看太湖波濤瀕洞半三吳寒通上畝咸池氣
黑入中流水伯都雲暗蛟龍應起立雪深鴻鴈自驚呼
望亭有酒宵堪醉買得漁家一尺鱸

寄題杜原父懷友軒

尺五城南近世紛移家本並武夷君他年功業誰青史
此日山林自白雲石氣曉侵書幌濕溪聲時雜棹歌聞

故人已同棲約仗策行穿虎豹羣

題黃州管氏懷坡堂

玉局仙人雲錦裳騎龍一夕下黃岡
戔戔冠蓋生陳迹落落江山有耿光
謫宦六年名益重懷賢千古意何長
君侯此舉誠佳事未數儋州載酒堂

瓜州與成居竹王克純登江風山月亭

風起西津斷客艘熊家亭上得憑高
雲移鳥影沈江樹雨帶龍腥出海濤
開闢自天留壯觀登臨如我老英豪

放舟擬就金山宿一夜清寒襲錦袍

奉答新仲銘禪師

吳楓初冷鴈連天夢在江南野水邊
詞客欲歸嗟老大美人不嫁惜嬋娟
豺狼正爾當官道龍象於今護法筵
我識新公老禪衲一燈蒲室是真傳

贈馬易之

萬里征帆渡越江茲遊奇觀世無雙
海中蓬島金銀闕天上玉堂雲霧牕
吾道政須求柱石詩壇從此避旌幢

青林白谷歸休地懷抱因君得暫降

水蟾為金齊賢賦

老蟾素魄稟金精千歲玻瓈幻結成明水夜零陰隧凍
丹書秋滿肉芝生腹凝寒露藏虛白影入銀河浴太清
擬問姮娥乞靈藥與君騎向廣寒行

吳江王氏水雲深處

潮平天濶開詩境宜著幽亭俯碧潄閒許釣徒分半席
靜饒沙鳥占全林青連河漢秋無極黑入菰蒲晚易陰

更好扁舟明月夜醉攜長笛寫龍吟

送式無外歸高麗

三韓山水有靈暉秀出斯人了佛機
岳寺禪餘留偈別王城齋罷戴經歸
瓶收滄海降龍入錫度秋空近鶴飛
只恐故林雲卧後一鐙秋老木棉衣

散木軒為陳則虛高士賦

散木軒中一散仙形雖如槁氣蒼然
路松正自為明誤社櫟還因不用全
梁棟無心聊閱世山林有地可長年

碧牕日靜忘機事悟得南華第四篇

送宋本禮部狀元調選還京

聖主求賢禮數崇策名高步冠南宮乘槎析木天津上
奏賦甘泉鹵簿中染翰墨凝仙掌露護衣香散御爐風
只今帝業熙千載正待儒臣黼黻功

春日懷柯博士

建章鶯轉曙光初上直門開漏點疎花擁西清森仗衛
星臨東壁煥圖書漢庭長者多推轂楚國騷人早卜居

為問五雲仙閣吏綵毫春咏近何如

題張性之提舉靜學齋

隱者城南水竹居蕭然一室白生虛傳聲吳會名家後
探道農黃邃古初日影上簾晴晒藥露涼侵戶夜翻書
元知靜裏工夫大欲乞靈方一起予

送劉侯赴大理

萬里南雲入馬蹄蠻酋迎拜過阿黎將軍拔劍歌玄武
使者乘軺祀碧雞六詔星文開井絡兩關鳥道揮天梯

聖朝謀帥先詩禮努力籌邊息鼓鼙

送柯敬仲之京

給事先皇禁邸中歸來空抱小臣弓
魚龍夜落黃河水鴻鴈秋征白雩風
郢國善歌推宋玉漢庭能賦待揚雄
如君必用才優俊重見金閨尺籍通

題遠碧樓

江上樓居景自清
闌干朝暮傍陰晴
數峰殘雨雲間濕
一水斜陽島外明
樹隔釣歌分浦出
風移帆影近牕行

綵衣白髮宜春酒更喜田園樂事成

二月望日湖上值風

疾風吹浪滿重湖雲掩西山一半無黃帽牽船依岸過
蒼頭按鵲繞林呼鶯花世界如春夢煙雨樓臺是畫圖
童穉茲遊今白髮斷橋斜日重踟躕

寄觀志能照磨

鰲背三山最上峰美人手把玉芙蓉仗圍泰時傳宵燎
漏下層城踏曉鐘錦瑟無塵飛刻鴈金壺有墨洒雕龍

老懷已託王郎道早晚歸營北澗松

十二月二十七日雪寒奉旨賜宴史局

聖主恩榮六賜筵玉音躬聽相臣宣史裁東觀何殊漢
人在瀛洲總是仙御酒如春浮浩蕩宮花與雪鬪嬋娟
微生此日沾休澤祇望丹宸祝萬年

初度日病起不能飲諸友載酒集書樓偶賦見
意

細雨東風泛曉煙草痕青過竹籬邊春當揆度靈均日

老及知非伯玉年病眼紛紜花似霧吟懷跌宕酒如泉
諸君有意留迂叟擬買雷塘百畝田

五言長體

題韋德中瑞竹亭

江館當西澁山堂向北隅舊樊聊補壞新竹復噓枯嘉
此神明勞森然雨露濡賢才世閩海之子冠洪都生意
原無息休徵固有符渾涵由地脉騰達即天衢故業詩
書遠能官俊造須材稱人似玉賓待鳳將雛照映丘園

重流傳賦咏俱擬同嘉樹傳來作瑞筠圖

送成禮部誼叔察訪守令河南山東

厯數開千載明良會一時朝廷嚴守令宵旰為黔黎南
服方多故東州復阻飢郎官膺簡拔使者出詢諮此命
於今重如君衆論推直承廉察往肯作畏難辭靈雨隨
華轂流風度綵旗草蕪驄一色柳與轡同絲梁宋分淮
甸青齊並海涯政苛嗟虎猛民散念鴻離罷軟寧勝任
奸貪只自私中年因雉見單父得魚知或有隳其職誰

能慎所司張絃從急緩朗鑒各妍媸治道誠先務皇心
實在茲俱為良吏選足慰遠人思空濶青雲步孤高玉
樹姿暫傾冠蓋餞行赴簡書期事業懸鐘鼎光華映羽
儀歸來前席問請入史臣詞

送彭大年真人祀東海東嶽東鎮

國典崇常祀名山仰岱宗聖王欽所遣使者肅惟恭禮
自唐虞秩神知造化鍾天門開巖嶠日觀上巖嵒零雨
行清道浮雲起盪胸宿齋分鶴帳朝饗發鯨鐘吹溢安

歌進靈來衛仗從御香分曉靄佩玉響琤琮美薦懷椒
精精誠莫璧琮東流瞻巨海列鎮到諸峰瀛島遙相望
仙人或此逢岳祇調虎豹水怪帖魚龍星墜祠光白煙
涵瑞氣濃振衣臨濬壑飛蓋拂長松庶物消餘沴洪河
復故蹤年祥報齊魯地寶出雷灘嘉澤羣方洽明時百
職供回車宜訪問弭節可從容世祚祈千億元功贊九
重禁庭歸福處有待頌東封

寄題顧仲瑛玉山詩一百韻

治理逢熙運欽明仰聖皇至仁侔覆載上德配軒唐大
業勤宏濟元臣協贊襄賢科收俊造庭實璨圭璋入貢
徠符拔儀韶下鳳凰普天均雨露絕域總梯航每念京
師食遙需漕府糧神妃所庇護颶母敢飛揚前隊貌貅
發先驅罔象藏冷颶鼓萬舵朱火耀連檣帝敕申嘉惠
祠官按典常賞勞兼湛澌時賜省臣漕臣酒幣旌烈特魏煌僕本
中林士久陪東觀郎遂叨乘驛傳徧與禮靈場蕩節雕
龍飾華旗畫隼翔銜流度鄴越陟險過泉漳緬彼湄洲

嶼嶄然鉅海洋蛟穿崖破碎鯨蹴浪撞搪震鼓轟空濶
奔帆截渺茫島衣迎使舸瘴霧避天香嘉薦歆芬苾陰
功助翕張精誠致工祝景貺答禎祥賈舶傾諸國輿圖
奄八荒身雖距閩嶠志已畧扶桑裴洞三生夢溫陵十
月涼茲遊平昔冠夙願一朝償女髻皆殊製蠻音各異
鄉地偏宜荔子人最貴檳榔釀鹿肥漂酒螭蟻液滿房
招賢簇車騎揮掃積縑緗窮臘纔竣事暄春始趣裝劍
津傳警急汀賊起狻猊獠砦旋戡定藩垣慎扞防思親

彌切切行役更遑遑狐死嗟奚首龜占喜允臧封崇晏

塢內木拱計峰旁

仲春至杭卜山于武康克裏先藏塢在計籌山下即予新墳

薄宦

祇牽率孤蹤易感傷暫為江左客誰洒墓頭漿逝矣川

塗阻淒其涕淚滂南轅恰啼鵑北路復鳴蜩粵若婁東

邑由來漢太倉機雲存故宅吳會畫雄疆遯跡晞高士

謂有梁鴻山

遺風挹讓王厥田尤沃衍比歲遭豐穰老我張

承吉新知顧辟彊聞君占形勝築室恣徜徉鐵笛留嚴

客青錢乞泰娘杏靨紅叱撥蘭柱繡鴛鴦關徑通佳處

栽桃帶柳塘脩梧羽葆蓋美竹碧琳瑯列岫濃螺色澄
湖淨鏡光鳥邊嵐漠漠魚外水泱泱鶴駐遊仙館鸞鳴
種玉岡投竿釣月檻隱几讀書牀雲結芝英秀花園桂
樹蒼舫齋青篠箔漁舍綠苔牆棟宇環相屬園池鬱在
望直疑金谷墅還似輞川莊未獲窺詩境相邀到草堂
開樽羅綺饌侑席出紅妝婉態隨歌板齊容縱舞行新
聲綠水曲穠豔大隄倡宛轉纏頭錦淋漓蘸甲觴弦鬆
調寶柱笙咽炙銀簧倚策驂聯轡鈎簾燭遶廊楚僮供

紫蟹庖史進黃虀卜晝寧辭醉留歡正未央分司莫驚
坐刺史欲無腸是集俱才彥虛懷共頡頏珠璣散咳吐
律呂應宮商鄭老經術富于仙詞翰長琦初燈並照郊
華驥同驤壁色牋毫健吟篇綵繪張拈題爭點筆得句
倏盈箱勁敵千鈞穀精逾百鍊鋼語奇凌鮑謝體變失
盧楊瑛甫早有譽亨衢那可量搏扶看怒翼騰達待蜚
黃旣薦朋情重仍持雅道昌披襟視肝胆刻琰播文章
永契欣依託衰蹤頓激昂盍簪承偉餞授簡藉餘芳自

鄙冥搜拙徒令屬對忙端如享敝帚何異貯奚囊談笑
聊堪接賡酬曷足當吾猶鄙以下公等楚之良瓠落渾
無用艱難寔備嘗擬為芝駕馬竟作觸藩羊筋力頻馳
驚功名幾慨慷不嫌成晚合深幸際時康邂逅因斯會
睽違又一方匆匆把別袂眷眷賦河梁鴻鴈清秋日薰
葭昨夜霜闕山凝朔氣星斗麗寒芒疾病家多難歸休
歲亦陽苦心甘寂寞短髮任蒼浪漏屋愁荷蓋塵衣惜
蕙纈杜陵非固懶賀監豈真狂回首長追憶緘詩遠寄

將乾坤浩今古此意詎能忘

元日靈臺官以初四日巳酉時享遂以歲除日

受誓於中書乃免朝賀紀詩八韻

清廟當春享彤庭放早朝
扈鳴更歷正龍集轉寅杓
瑞日開黃道卿雲映絳霄
八方周象譯九奏舜簫韶
爐暖香生木杯紅酒泛椒
新符鬱壘換候琯女夷調
有待寬書下行看戰甲銷
哀年今可隱歸老故山樵

分題送京兆趙耕師尹之臨安路帥府照磨得

通海湖

萬頃平湖碧浮光映沆瀣秀山純漫影滄海暗通潮
障黑雲相蕩春澄雪未銷潤沾蒙部潤川合洱河遙
杭稻收田利蒲魚入市饒雨歸龍氣濕晴浴鶴媒驕
夾樹迷深箐流花落野椒羶來蠻婦漂船放焚僮橈
帥府開荒甸英才屈下僚此心同逝水日夜向東朝

送劉貞庭總管之嘉禾

御史宣
徽院判

牧守膺民寄循良不數公使君新建隼御史近乘驄
內

府聲華著專城控制雄老成歸物望清切簡宸衷紫綬
盤銅虎朱旛擁畫熊焚香迎父老騎竹走兒童檣李名
藩古勾吳地利通粵從師次後俱在震隣中水暗臺隍
月雲寒鼓角風蠻氛猶漲黑戰血未消紅聖主方圖治
台司亦即戎頻煩綸綍下次第甲兵空公等宜宣力王
臣固匪躬關防先武備國計務農功黃霸徵當最陽城
考欲同蒼旻飄勁氣白日照精忠萬象天樞北三山海
市東旱龍俄作雨

時喜得
雨故及

陽鳳已鳴桐善政風須變虛

襟理自融平生經世志要似節軒翁

福唐張氏永思堂

自昔閩多士吾宗世有人共聞兩孝子永慕百年親
儂若音容在巍然棟宇新秋筵仍几杖溫鼎自淳珍
草娛稱觴地花迎戲綵辰流芳變春雨精思動秋旻
風教關民俗文章藉史臣聲詩播休美正為盛時陳

成居竹有書報甥傳君亮至揚州言其家與外
表舅吳仲益及婦家二叔學生韓與玉全家

無恙喜甚有懷

始得平安信，渾紆悵望心。
爭看尺素字，絕勝萬黃金。
危甚初秋警，幾於平陸沈。
蜂屯昱嶺上，猳突浙江潯。
縱爾驅鋒鏑，能逃礮斧砧。
官軍俄克復，亂首即成擒。
城市半焦土，親朋多好音。
已知生有路，暫免淚沾襟。
老子歡殊劇，家人酒快斟。
狂歌敲手板，醉倒脫頭簪。
黎庶思甦息，皇天願照臨。
國威雖震疊，兵氣尚蕭森。
自顧形骸累，仍嗟歲月侵。
懷歸畏吏議，承乏念官箴。
虎豹關非遠，龍蛇

水更深豈無黃石略虛遣白頭吟落日耿殘雪浮雲生
夕陰枯萁聞齧馬疎樹見棲禽松竹荒須理茆茨破可
尋前身本道士不是戀山林

七言絕句

送林崇高還武夷山

雲巖巖下聘君家長記宵談到曙霞今日隴頭誰洒飯
鷓鴣啼老白桐花

武夷山中毛竹多神君一去奈山何松風猶帶琅璈響

散入遺音作棹歌

七月望日徐勉自武林來得兩訃音

海舟隔歲望回音及得回音恨更深從此遠書無用寄
九原蕪沒轉傷心

外來喪逝訃音來女嫁桐陵亦告哀老眼今朝方是哭
百年心事總成灰

予京居廿稔始置屋靈樁坊哀老畏寒始製青
鼠袍且久乏馬始作一車出入皆賦詩自志

五槐濃綠蔭門前東宇西房數十椽不是衰翁買屋住
歸時留作僱船錢

青鼠毛衣可禦寒禿襟空裊放身寬遮頭更著狐皮帽
好箇儂家老契丹

淺淺輕車穩便休何須高蓋與華輶短轅不作王丞相
下澤聊為馬少游

讀瀛海喜其絕句清遠因口號數詩示九成皆
寔意也

一日糧船到直沽吳罌越布滿街衢新詩將作如干首
為問郊郎有買無

接糧御史性情真斷事官來苦怒嗔索酒索錢橫生事
遭風遭浪肯知人

客牕昨夜北風高猶似乘船海上濤明發先宜覓貂鼠
喚人來作禦寒袍

虎賁坐甲夜傳更千步廊街鼓柝聲未許離人眠得熟
馬蹄車鐸又天明

拂郎之馬走千里獨立長嘶凡馬空昔在江南看圖畫
今來天廡識真龍

賽娘十五解新聲楊柳腰肢怯囀鶯好寫潘郎胡十八
教伊傳唱滿京城

長川妓子早晨來戴笠騎驢帕擁腮總在狹斜坊裏住
教坊日日聽差回

杖履尋花虎丘寺壺觴按曲館娃宮阿成殺受吳中樂
請入風沙海浪中

結束黃騮粉畫鷁更投西市買長鞭知儂已有南歸日
戶部來催助燕錢

大風塵土漲天飛遮眼烏紗拍馬歸還是洞庭湖水好
待郎來浣舊征衣

大年小景

一川風柳綠傿傿古木茅茨近澗阿漢上無人船不渡
水禽飛處夕陽多

春澹空山不自聊幽花老畫國香銷只今愁絕沅湘路

誰與侯芭賦楚招

采采幽芳不盈把
好收風露入銅瓶
虎丘老衲今何在
思見蘭芽石上青

幼闇宗師以詩招賞海棠文申有詩見約次韻
自是仙家春日遲
紫綰無數裊柔絲
憑君多置看花酒
肺渴如今似漏卮

環樞堂上遲明來
要向花前不放杯
只恐狂風無顧藉
盡將春色委蒼苔

好懷日近少曾開心憶湖山曾屢回不是故人多雅致
誰能相約看花來

廉子祐歸省金陵且就秋試作三絕句贈別

故園歸思浩無涯更聽啼鶉惱客懷後夜月明應有夢
先隨潮水過秦淮

陌上吹衣柳絮風凭君莫放酒杯空歸舟總是傷情處
一路殘山剩水中

自昔高科取俊英布衣徒步到公卿廟堂今日求材切

正待諸君策治平

王杲東白墨蘭樵題詩用韻其左并寓所懷

光風葉葉露香新
欲采幽芳惜暮春
幾度玉笙吹夜月
瀟湘雲斷不逢人

早出北城迎社稷香輿

我如老馬怯征鞍
推起東牕欲起難
昨日風雷驅電過
滿衣明月五更寒

偶成二絕句簡魯威學士

雲物淒涼小雪初
半庭殘菊蝶來疎
連朝筆硯多忙事
借得東泉學士書

病起頭顱不可風
南牕晴日正融融
天憐老境無差使
乞與詩篇酒醕中

小游仙詞

清華公子並騎龍
直過蓬萊第一峰
親見海中城闕好
半栽玉樹半芙蓉

五色煙中玉女牕
鳳歌鸞舞一雙雙
除是飛瓊方教得

紫簫吹徹不成腔

來不分明去不言紅椒花露濕妝痕巫娥已逐夢魂斷

十二碧峰愁暮猿

月圓羣芳次第開步前紅露下瑤階擣菰偶共真妃博

賭得雙頭白燕釵

道人寄我紫邏山時復賣藥來人間石潭薄晚有龍鬬

湍谷濕雲無路還

五嶽真官立帳前露蕪香靄落瓊筵夜深醮罷各歸去

一一馬聲嘶上天

美人臨水笑相邀
自解羅巾擲作橋
同覓雲間仙伴侶
杏花壇上聽吹簫

月帳新開藥輦過
桂花涼露洒天河
雙星一夜叙離別
狼藉碧蓮秋露多

招韓伯清泛湖

南園攜手賞芳紅
喚取能歌盛小叢
傳與春風留杏萼
明朝開向曲聲中

段橋春水綠初柔
便有羣鳬來上游
好借鳴夷盛酒去
玉簫吹上畫船頭

蛻菴集卷五